

DOMENIE XXX «VIE PAL AN»

Antifone di jentrade Sal 104,3-4

Che il cûr si indalegri di ducj chei che a van cirint il Signôr.
Cirît il Signôr e la sô potence;
cirît di un continui la sô muse.

Colete

Diu onipotent e eterni,
fasinus cressi la fede, la sperance e la caritât,
e, par podê vê ce che tu imprometis,
fasinus volê ben a ce che tu nus comandis.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Sir 35,12-14.16-18

La preiere dal umil e travane i nûi.

Dal libri dal Fi di Sirac
Il Signôr al è un judic di chei vêrs,
che no si lasse inceâ de aparince.
Nol fâs plasês a spesis dal puar,
ma al scolte la sô preiere se al è maltratât.
Nol reste sort a la preiere dal vuarfin
e de vedue che si sfoghe vaint.
Chel che al siervis Diu come che al vûl lui, al sarà ben viodût,
la sô preiere e rivarà fintremai ai nûi.
La preiere dal umil e travane i nûi:
fin che no rive, lui no si da pâs,
fin che l'Altissim nol met man jê no si ferme,
par ricognossi e par fâ rispietâ il dirit dai juscj.
Peraule di Diu.

SALM RESPONSORIÂL dal Salm 33

R. Al rive denant de tô muse, Signôr, il berli dal puar.

O vuei benedî il Signôr cence polse,
la sô laut simpri su la mê bocje.
La mê vite tal Signôr si glorie,
che lu sepin i puars e si indalegrin. R.

Il Signôr al ten di voli chei che a fasin robatis,
par scancelâ ancje il lôr ricuart di cheste tiere.
I juscj a àn berlât e il Signôr ju à sintûts
e ju à deliberâts di ogni berdei. R.

Se un al à il cûr displasint il Signôr i sta dongje,
se al à il cûr pintût lu salve.

Il trist al è fat fûr de sô tristerie;
chei che a odein il just a àn di purgâlis. R.

SECONDE LETURE 2 Tm 4,6-8.16-18

E je za pronte par me la zoe de justizie.

De seconde letare di san Pauli apuestul a Timoteu

Benedet, par chel che mi rivuarde, jo o soi za spandût in libagjon e al è rivât il moment di molâ lis velis. O ài combatude la buine batae, o ài finide la corse, o ài mantignude la fede. Pal rest e je za pronte par me la zoe de justizie, che in chê dì me consegnarà il Signôr, lui che al è un judic just; e no dome a mi, ma ancje a ducj chei che a àn spietade cun dut il cûr la sô vignude.

Inte mê prime difese, no ài vût dongje di me anime vive. Mi àn implantât dal prin al ultin. Che no ur sedi metût in cont di colpe. Il Signôr però mi à judât e mi à dade fuarce par che midiant di me la predication dal vanzeli e rivâs insom e ducj i paians le scoltassin: e cussì o soi stât liberât de bocje dal leon. Il Signôr mi libererà ancjemò di ogni opare triste e mi salvarà menantmi tal so ream dal cîl. A lui la glorie tai secui dai secui. Amen.

Peraule di Diu.

CJANT AL VANZELI cf. Mt 11,25

R. Aleluia, aleluia.

Benedet sêstu tu, Pari,
Signôr dal cîl e de tierie,
parcè che ai piçui tu âs palesât
i misteris dal ream dai cîi.

R. Aleluia.

VANZELI Lc 18,9-14

Il publican al tornà a cjase justificât, il fariseu invezit no.

Dal vanzeli seont Luche

In chê volte, Jesù al disè un'altre parabule par un pôcs di lôr che a jerin convints di jessi juscj e a spreseavin chei altris: «Doi oms a lerin sù tal templi a preâ: un al jere fariseu e chel altri publican. Il fariseu al stave in pîts e al preave cussì: Diu, ti ài agrât parcè che no soi come chei altris oms, laris, triscj, sporcacjons, e nancje come chest publican culi. Jo o zuni dôs voltis par setemane e o ufris la decime di dut ce che o ài. Il publican invezit si fermà lontan e nol olsave nancje a alcâ i vîoi viers dal cîl, ma si bateve il pet e al diseve: Diu, ve remission di me, pecjadôr. Us dîs che chest culi al tornà a cjase justificât, chel altri invezit no, parcè che chel che si alce al vignarà umiliât e chel che si umilie al vignarà alcât».

Peraule dal Signôr.

Su lis uiftis

Cjale di bon voli, Signôr,
i regâi che o presentin a la tô maiestât,
par che l'ufierte dai tiei servidôrs
e ledi sù viers de tô glorie.

Par Crist nestri Signôr.

Antifone a la comunioñ cf. Sal 19,6

Si indalegrarin de tô vitorie
e o gjoldarìn tal non dal nestri Diu.

Daspò de comunioñ

I tiei sacraments, Signôr,
che a operin in nô ce che a significhin,
par che o podin gjoldi te plenece de veretât
ce che cumò o fasìn in maniere velade.
Par Crist nestri Signôr.